

07 AUG 1998

CATS-Ekonomi

CATS RADIO TIDAK AKAN DIHENTIKAN WALAUPUN EKONOMI GAWAT

KUCHING, 7 Ogos (Bernama) -- Cats Radio, stesen radio swasta pertama di Sarawak yang dilancarkan oleh Perdana Menteri Datuk Seri Dr Mahathir Mohamad dua tahun lepas, tidak akan menghentikan operasinya walaupun menerima kesan akibat kegawatan ekonomi.

Ketua Pegawai Eksekutifnya Affandi Tahir berkata, Cats (Ceriakan Aspirasi Terkini Sarawak) masih lagi di bawah pengurusan yang sama, Kristal Harta Sdn Bhd dan waktu siarannya di udara tidak akan dipendekkan.

"Kami akan berkembang dalam tempoh tiga tahun dari sekarang dengan mempelbagaikan kegiatan yang tidak hanya tertumpu kepada pengiklanan saja, dan dengan pengurusan mantap Cats Radio mampu bertahan," katanya pada persidangan media di sini hari ini.

Affandi yang mengambil alih jawatan itu bulan lepas berkata, jumlah kakitangan Cats Radio kini ialah 27 orang berbanding lebih 40 orang sewaktu pelancarannya.

Stesen tersebut memulakan operasinya selama 24 jam sehari pada 8 Ogos 1996 dengan pelaburan sebanyak RM7.5 juta termasuk kos pemancar siaran, peralatan studio dan kerja pengubahsuaian studio.

Awal tahun ini Cats Radio telah menutup enam daripada 11 stesen pemancarnya sebagai langkah sementara. Stesen itu ialah di Sri Aman, Sarikei, Lawas, Kapit, Singalang dan Bakun sebagai langkah yang akan menjimatkan kos penyenggaraan tahunan sebanyak RM3 juta.

Setakat ini hanya lima stesen Cats Radio beroperasi iaitu di Kuching, Sibu, Miri, Bintulu dan Limbang.

Affandi juga berkata, Cats Radio akan mengubah waktu siarannya mengikut panduan Kementerian Penerangan mulai esok dengan pecahan waktu siaran Bahasa Melayu 46 peratus, Bahasa Inggeris 29 peratus, Mandarin 21 peratus dan Iban empat peratus.

Beliau berkata, siaran radio berbahasa Melayu akan ke udara selama 11 jam, Inggeris tujuh jam, Mandarin lima jam dan Iban satu jam.

Waktu siaran Cats Radio ialah 2 pagi hingga 8 pagi Bahasa Melayu, 8 pagi hingga 10 pagi Inggeris, 10 pagi hingga 1 tengah hari Mandarin, 1 tengah hari hingga 3 petang Bahasa Melayu, 3 petang hingga 6 petang Bahasa Inggeris, 6 petang hingga 7 malam Bahasa Iban, 7 malam hingga 9 malam Mandarin, 9 malam hingga 12 tengah malam Bahasa Melayu dan 12 tengah malam hingga 2 pagi Inggeris, katanya.

-- BERNAMA

RDY NMO